



PRIVREDNA KOMORA KANTONA SARAJEVO

Broj: 04/MK/7-188-1/11
Sarajevo, 14.12.2011. godine

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
VLADA KANTONA
71000 SARAJEVO
Reisa Džemaludina Čauševića 1

**Predmet: Primjedbe, prijedlozi i sugestije na
Nacrt budžeta Kantona Sarajevo za 2012. godinu**

Poštovani,

U prilogu Vam dostavljamo primjedbe, prijedloge i sugestije članova Komore na Nacrt budžeta Kantona Sarajevo za 2012. godinu, koje je razmatrao i Upravni odbor Privredne komore Kantona Sarajevo, na svojoj devetoj sjednici, održanoj 08. decembra 2011. godine.

Očekujemo da će prijedlozi poslovnog sektora Kantona Sarajevo doprinijeti donošenju što kvalitetnijeg Budžeta Kantona Sarajevo za 2012. godinu.

S poštovanjem,

PREDSJEDNIK

Kemal Grebo, dipl.oec.

Prilog: Primjedbe, prijedlozi i sugestije



71000 Sarajevo, La Benevolencija 8
Tel: (00 387 33) 250 100, 250 101, 250 196, Fax: (00 387 33) 250 137, 250 139
www.pksa.com.ba, webmaster@pksa.com.ba



I - PRIMJEDBE I SUGESTIJE

- Komora je svjesna teške ekonomske ali i socijalne situacije u Kantonu, Federaciji BiH i zemlji, te da niz negativnih okolnosti utiče na visinu sredstava planiranih u Nacrtu Budžeta za 2012. godinu, odnosno da je to najveći uzrok zbog kojeg su planirani iznosi nedovoljni za oblasti koje imaju razvojni karakter, tako da se može konstatovati da je Budžet za 2012. godinu nerealno planiran, na bazi Budžeta za 2011. godinu. U vremenu ekonomske krize, pa i njenog očekivanog „povrata“ u nerednoj 2012. godini, vlast bi posebnu pažnju morala i trebala pokloniti razvojnom karakteru Budžeta što ni u ovom slučaju, kao i predhodnih godina nije slučaj.
- Planirani prihodi se iz godine u godinu umanjuju, a i ono malo sredstava nije racionalno raspoređeno. Planirani su prihodi najviše od indirektnih poreza oko 188 miliona i prihoda od poreza na dohodak oko 48 miliona KM. To je u strukturi prihoda oko 75% Budžeta, međutim, index je ispod 50%. Ono što se nikako ne može prihvatiti je nerealni planirani prihod od 440,5 miliona KM jer nedostaje oko 60 miliona KM. Odakle ostvariti ta sredstva, pogotovo kada se imaju u vidu deficiti iz ranijih godina koji se prenose. Činjenica je da su sredstva od MMF potrošena, kao i sredstva od komercijalnih banaka.
- Komora cijeni napore Vlade Kantona, posebno pojedinih resornih ministarstava, da znatna sredstva Budžeta usmjere na izgradnju nove i poboljšanje postojeće infrastrukture Kantona, posebno energetske i saobraćajne, koji podrazumijevaju stvaranje boljeg ambijenta za ulazak stranih investitora u Kanton i šire. Međutim, planirati sredstva za izradu Studije za energetske efikasnost u Kantonu Sarajevo u iznosu od 332.100,00 KM je previše i da je situacija puno bolja.

Činjenica je da se Ministarstvu prostornog uređenja, kao i Ministarstvu saobraćaja, poklonila dužna pažnja obzirom na planirano i dugo očekivano intenziviranje izgradnje saobraćajne infrastrukture, rješavanja problematike oko imovinskih odnosa, što je za pozdraviti jer će takve aktivnosti znatno potaknuti rast ostalih pratećih privrednih grana. Ipak je većina sredstava Budžeta Kantona Sarajevo za iduću godinu usmjerena u neprofitne grane. Uz dužno poštovanje prema potrebi da se bar djelimično saniraju gubici određenih javnih subjekata, ekonomska i privredna situacija nalaže da se vlast u partnerstvu sa poslovnim sektorom Kantona okrene privrednoj problematici, značajnijoj pomoći privrednim subjektima i otvaranju novih radnih mjesta.

Komunalnim preduzećima se mora omogućiti poslovanje na ekonomskim principima, a sredstva namijenjena istim usmjeriti u socijalne fondove. Tek tada bi mogli govoriti o poslovanju tih kompanija i drugim problemima sa kojima se suočavaju.

- U tabelarnom prikazu, postoje određene nelogičnosti tako da se na mjestima gdje je trebalo iskazati index prikazano je učešće ili obrnuto. Postavlja se pitanje da li je to namjerno izbjegnuto kako bi se zamaglila situacija.

II – PRIJEDLOZI

- U cilju održavanja dostignutog nivoa privrednog razvoja u Kantonu, u vremenu teške finansijske krize i recesije potrebno je smanjiti opštu potrošnju za 3 do 5%, te **planirati stimulativniju raspodjelu budžetskih sredstava za 2012. godinu od ponuđene u Nacrtu**, čime bi Budžet dobio **razvojni karakter** neophodan za prevazilaženje navedene situacije.

Objasnenje:

Učešće sredstava u ukupnom Budžetu namijenjenih Ministarstvu privrede u 2012. godini od 2,74% (19,8 miliona KM) je minorno i djeluje destimulativno na poslovni sektor, te daje sliku odnosa vlasti prema ukupnom realnom sektoru. Ako se iz navedenog iznosa isključe sredstva planirana za Kantonalnu upravu za šumarstvo, kao strogo namjenska sredstva od 5,2 miliona KM i sredstva za tekuće izdatke organa uprave Ministarstva od 1,3 miliona KM, za privredu Kantona ostaje ukupno 13,3 miliona ili samo 1,8% ukupnih sredstava Budžeta Kantona.

Sa ovako planiranim iznosom poslovni sektor ne može zadržati dostignuti nivo razvoja, a da se ne pominje otvaranje novih MSP i radnih mjesta. Ovakvim rješenjima mora doći u pitanje i socijalni mir jer je brži rast registrovane nezaposlenosti od zapošljavanja.

Na drugoj strani u Budžetu je planiran brži rast i više učešće sredstava za ministarstva koja imaju neprofitabilne djelatnosti, gdje su planirana sredstva za određena uređenja eksterijera javnih površina znatno viša nego ukupna sredstva za stimulisanje privrednog razvoja Kantona.

- **Obezbijediti veći iznos poticajnih sredstava za razvoj MSP, u tekućim transferima Ministarstva privrede Kantona za 2012. godinu.**

Objasnenje:

Poticajna sredstva za razvoj MSP, u tekućim transferima Ministarstva privrede, u iznosu od **100.000 KM sa učešćem od 0,01% u Budžetu Kantona Sarajevo za 2012. godinu**, po mišljenju poslovnog sektora, daju sliku neodgovornog odnosa vlasti spram problematike u kojoj se nalaze privredni subjekti, odnosno MSP. Ovaj iznos svakako ne može ostvariti cilj-pomoć malim i srednjim preduzećima.

- **Obezbijediti veće poticaje u primarnoj poljoprivrednoj proizvodnji.**

Objasnenje:

Politiku poticaja ne treba tretirati samo kao novčane subvencije već kao strateški instrument za dalji razvoj poljoprivredno – prehrambenog sektora u Kantonu Sarajevo.

Ovim nacrtom je za unapređenje razvoja poljoprivrede predviđeno 4.480.000 KM, od čega se za razvoj primarne poljoprivredne proizvodnje planira izdvojiti 4.180.000 KM, što je **0,57%** od ukupno predviđenog iznosa Budžeta Kantona Sarajevo. Ova sredstva ne mogu bitnije poboljšati položaj primarne poljoprivredne proizvodnje.

- **Planirati sredstva za poticaje, prvenstveno za razvoj i modernizaciju industrije, te izgradnju nove industrijske infrastrukture neophodne za dinamiziranje industrijske proizvodnje u Kantonu Sarajevo (industrijske zone, tehnološki parkovi, poslovne zone, slobodne zone i dr.).**

Objasnenje:

Već duži vremenski period Komora ukazuje na **neophodnost donošenja nove Strategije privrednog razvoja Kantona Sarajevo**, obzirom na katastrofalne posljedice neodgovarajuće razvojne politike u velikom dijelu poslijeratnog perioda po proizvodnju, izvoz i zaposlenost, na što su uticale i posljedice agresije, a u posljednje vrijeme i globalna finansijska i ekonomska kriza.

Zbog toga je neophodno planirati donošenje nove dugoročne i srednjoročne Strategije razvoja Kantona Sarajevo, gdje će akcenat biti na razvoju i modernizaciji industrije, te izgradnju nove industrijske infrastrukture neophodne za dinamiziranje industrijske proizvodnje u Kantonu Sarajevo (industrijske zone, tehnološki parkovi, poslovne zone, slobodne zone i dr.).

Razvoj industrijske infrastrukture podrazumijeva, između ostalog, **donošenje nove legislative kojom bi se regulisao rad industrijskih zona u Kantonu Sarajevo**, oživljavanje postojećih i otvaranje novih industrijskih zona u Kantonu Sarajevo, kroz stimulativniju politiku poslovanja privrednih subjekata u industrijskim zonama.

- **Planirati realnije iznose sredstava za KJP Centar Skenderija i KJKP «RAD» poštujući Odluke Vlade i Skupštine Kantona Sarajevo, te iskazanog javnog interesa iz ovih djelatnosti.**

Obrazloženje:

Sve dok se ne omogući ovim preduzećima poslovanje na tržišnoj osnovi, potrebno je realnije planirati sredstva za njihovo investiciono i tehničko održavanje u cilju stabilnosti i sigurnosti njihovog normalnog funkcionisanja (konkretni prijedlozi dostavljeni direktno nadležnim organima).

- **Planirati sredstava za realizaciju projekta «Projekat izgradnje rashladno – skladišno-distributivnog centra udruživanjem (ulaganjem) privatnog i javnog kapitala».**

Obrazloženje:

Nakon donošenja Zakona o javno-privatnom partnerstvu u Kantonu Sarajevo potrebno je aktuelizirati ranije dostavljen prijedlog Komore za izradu projekta: «Projekat izgradnje rashladno – skladišno-distributivnog centra udruživanjem (ulaganjem) privatnog i javnog kapitala», s naznakom o prednostima udruživanja privatnog i državnog kapitala, a po mogućnosti i sredstva za **ranije projekte koje je Komora dostavila Vladi KS, a koji se odnose na politiku razvoja industrije, strategiju zapošljavanja, razvoj ruralnog sektora, projekata razvoja turizma.**

- **Planirati sredstva za projekat regulacije korita rijeke Bosne i pritoka.**
- **Planirati sredstva za izvođenje radova za priključenje na zaobilaznicu, od Stupske petlje.**

Obrazloženje:

U vremenu opšte krize i nedostatka posla neophodno bi bilo angažovati domaću građevinsku operativu na projektima od javnog interesa koji ne iziskuju veća ulaganja, kao što su projekti regulacije korita rijeke Bosne i pritoka i radovi za priključenje na zaobilaznicu, od Stupske petlje.

- **Planirati sredstva za finansiranje projekata iz kulture i umjetnosti.**

Obrazloženje:

Sredstva izdvojena za kulturu su neznatna, što je nedopustivo za glavni grad BiH. Ukoliko ima viška novaca onda ih ne treba usmjeravati na razna sponzorstva i donacije nego u rekonstrukciju i održavanje BKC-a, izgradnju koncertne dvorane i rad drugih kulturnih institucija.

Privredna komora Kantona Sarajevo očekuje da će resorno ministarstvo i Vlada Kantona sagledati i razmotriti dostavljena mišljenja i prijedloge poslovnog sektora te da će u skladu sa tim poduzeti aktivnosti na pozitivnim promjenama u Budžetu dajući mu više karakter razvojnog nego socijalnog.

Samo privredni razvoj i zamah investicionih aktivnosti u Kantonu Sarajevo može obezbijediti siguran dotok sredstava u Budžet Kantona za sve njegove korisnike.